

**■ TRIBUNA POLITICA**

# La politica culturala en il focus da la publicitad

DA MARTIN JÄGER,  
CUSSEGLIER GUVERNATIV

**E**n il discurs politic actual survegn la cultura evidentamain adina daplì impurtanza. Quai audan e sentan ins. E quai è allegraivel. Sin plaunaziunal e chantunal vegn debattà publicamain davart il futur da la promoziun da la cultura, betg mo per motivs economics, mabain almain uschè fitg er pervia da dumondas che resultan da la cultura e che concernan l'identitad, la patria, il cor da la cultura, la cultura populara e l'auta cultura.

**I**l chantun Grischun, mes departament, mias collavuraturas e mes collavuratur s'engaschan per ina vasta vita culturala e per ina viva confruntaziun cun las tradiziuns vividas. Ultra dal sustegn da la diversitad culturala cumpiglia quai er la tgira da la cultura, l'intermediaziun da la cultura ed il mantegniment resp. la promoziun da la trilinguitad chantunala. Per quest intent metta il chantun a disposiziun meds finanzials considerabels a favur da la promoziun da la lavur culturala en las diversas spartas da cultura, en las differentas linguas e regiuns. Nus sustegnain instituziuns, organisaziuns, organisaturas ed organisatur sco er personas che lavuran sin il champ cultural cun la finamira da promover l'ac-



cess a la cultura ed il mantegniment da la cultura. Ina vita culturala activa è numnadamain ina contribuziun impurtanta, gea indispensabla a favur d'ina societad averta e viva.

**L**a promoziun chantunala da la cultura sustegna en moda subsidiara; ella s'engascha pia adina complementarmain a las contribuziuns da personas privatas e da vischnancas. Quai fa ella cun impunder meds finanzials dal budget ordinari sco er dal fond da la lottaria naziunala. L'onn 1998, l'emprim onn suenter che la lescha chantunala per promover la cultura è entrada en vigur, ha il chantun impundi var 4 milliuns francs per la promoziun da la cultura. L'onn 2012 èn quai gia stads 9,3 milliuns francs, e quai senza resguardar ils daners che van a favur da la promoziun da las linguas. Il chantun ha pia pli che dublegià ses sustegn finanziel. Bunamain anc pli

svelt è dentant il dumber da dumondas per sustegn cultural creschì durant il medem temp.

**L**'uffizi da cultura survegn passa 800 dumondas per onn. Mo circa in quart da las dumondas vegn refusà en il Grischun. Auters chantuns concentreschan evidentamain lur sustegn cultural sin singulas instituziuns exemplaricas. Quest sustegn da projects da «signal» vegn qua e là propagà er en il Grischun. A chaschun d'ina occurrenza da podium en il teater a Cuira ha l'incumbensà da cultura da Basilea-Champagna declerà dacurt che 70 pertschient da las dumondas inoltradas vegnian refusadas en ses chantun.

**J**au sun persuadi che nus na duessan betg far in tala politica da surdada er en il Grischun. Per l'ina na dastgain nus betg exponer la lavur culturala professiunala ad ina concorrenza cun la cultura populara viva. Er areguard la promoziun da la cultura è il Grischun incumparegliabel ed auter che chantuns monolingvs pli pitschens. Per l'autra stoi er esser en l'avegnir nossa finamira da mantegnair nossa cuntrada da cultura trilingua – davent da la Val Calanca fin en la Val Müstair, davent da Tujetsch fin a St. Antönien – en tut sia amplexa e cun tut sias furmas multifaras.